

08/07/2002

Puteri buka pusat komuniti di pedalaman

PENDANG, Ahad - Puteri Umno Kedah akan membuka lebih banyak pusat komuniti di kawasan pedalaman supaya masyarakat mendapat manfaat daripada khidmat sosial yang disediakan.

Ketuanya, Suraya Yaacob, berkata sebagai permulaan, sebuah pusat komuniti pergerakan itu yang diubah suai daripada kontena dan dilengkapi kemudahan kerusi meja akan dibuka di kawasan penempatan Felda Sungai Tiang, di sini.

Katanya pusat komuniti yang akan turut dipasang alat penghawa dingin kemudian boleh dijadikan kelas tuisyen bagi murid berumur antara tujuh hingga 12 tahun yang tinggal dan bersekolah di kawasan sekitar.

"Pusat itu yang kedua di negara ini dan turut menyediakan kemudahan perpustakaan. Ia akan dirasmikan Naib Presiden Umno, Datuk Seri Najib Tun Razak, Selasa ini," katanya di majlis penerangan menentang isu sumbang mahram Puteri Umno negeri di Felda Sungai Tiang di sini, semalam.

Suraya berkata, pusat komuniti Puteri Umno pertama di Kampung Medan, Selangor, yang dilancarkan Perdana Menteri, Datuk Seri Dr Mahathir Mohamad beberapa bulan lalu, berjaya menarik minat masyarakat setempat.

"Kita yakin dapat membuka lebih banyak pusat seumpama itu di negeri ini dan ia sebagai tanggungjawab sosial Puteri Umno terhadap masyarakat luar bandar," katanya.